

❧ PSE QUHET “NATA E KADRIT” ? ❧

1. Fjala “Kadr” ka disa kuptime ku njëri prej tyre është dhe nderim ose respektim, sepse ajo është natë e cila nderohet dhe ka një pozitë të veçantë tek Allahu, për shkak të karakteristikave të saj. Po kështu dhe personi i cili qëndron zgjuar, duke iu lutur Zotit gjatë kësaj nate, pajiset me një nder të veçantë. Në një ajet Kur'anor Allahu e quan **“Natë të Begatshme”** për mirësitë e shumta që u jepet njerëzve.

2. Kuptim tjetër i kësaj fjale është se Kadr don të thotë dhe shtrëngim, ngushtim (*i njohurive*) në kuptimin se dituria e saktë se kur është kjo natë, është e fshehur në dhjetë netët e fundit të Ramazanit, siç do ta shohim më poshtë. Në lidhje me këtë kuptim të kësaj fjale (*shtrëngim, ngushtim*) El-Halil ibën Ahmed, një dijetar i njohur ka thënë: **“Është quajtur “Nata e Kadrit” pasi bota shtrëngohet nga numri i madh i melaikeve që zbresin në këtë natë”**.

3. Gjithashtu Kadr ka dhe kuptimin Kader (*paracaktim*), se në këtë natë paracaktohet se çfarë do të ndodhë për një vit (*siç do ta shohim më vonë*).

Këtu kemi përmbledhur vetëm disa prej kuptimeve që përmban ky emër, kuptime që në tërësi shprehin vlerat e saj.

❧ Ç'ËSHTË NATA E KADRIT? ❧

Allahu i Madhëruar thotë në suren El Kadr:

- 1- Ne e zbritëm atë (*Kur'anin*) në Natën e Kadrit.
- 2- E ç'të bëri ty të dish se ç'është Nata e Kadrit.
- 3- Nata e Kadrit është më e vlefshme se një mijë muaj!
- 4- Me lejen e Zotit të tyre në (*atë natë*) zbresin engjëjt dhe Xhibraili për secilën çështje.
- 5- Ajo është paqe deri në agim.”. (El-Kadr: 1-5).

Pra sipas ajeteve Kur'anore të cituara, Nata e Kadrit është nata me e vlefshme dhe me e rëndësishme, sepse në të ndodhi zbritja e Kur'anit, drita nga Allahu për të zhdukur errësirën e mosbesimit dhe për të vendosur në vend dinjitetin njerëzor, që ishte nëpërkëmbur. Kur'ani i tregoi njeriut se cili ishte ai në të vërtetë, e largoi njeriun nga adhurimi dhe përgjërimi ndaj çdo gjëje, drejt adhurimit të Atij që e meriton këtë adhurim, ndaj Zotit Krijuesit të tij. Kur'ani i rivendosi dhe një herë lidhjet mes Krijuesit dhe njerëzve të cilët e kishin harruar Zotin e tyre. Kur'ani i tregoi njeriut se është i lirë dhe jo skllav i tekave të njerëzve me pushtet dhe se ai i lutet dhe i mbështetet vetëm Zotit. Njerëzit e festojnë ditën kur çlirohen nga ndonjë pushtues i jashtëm, por të mos harrojmë se Kur'ani e çliroi njeriun nga “pushtuesi” i brendshëm që është egoja e njeriut dhe prirja e tij për vepra të ndaluara dhe të shëmtuara. E pra a nuk e meriton kjo natë, nata e zbritjes së Kur'anit, që të jetë festë për mbarë njerëzimin!

Allahu në këtë natë e zbriti Kur'anin Famëlartë nga LEUHI MAHFUDHI (*pllaka e ruajtur mirë tek i Madhi Zot*) për në BEJTUL IZEH, që është në qiellin e dunjasë. Kur'ani më pas iu zbrit Muhamedit, alejhi selam, për rreth njëzet e tri vite me radhë, sipas nevojave që dilnin. Për këtë shkak Nata e Kadrit paraqet ngjarjen më të rëndësishme dhe më madhështore në historinë e njerëzimit dhe si e tillë e ndryshojë rrjedhën e saj, sepse Shpallja e Kur'anit në këtë natë madhështore “lidhi” qiellin me tokën, njeriun me Krijuesin e vet. Kur'ani hyri në historinë njerëzore, në të ai nuk mbeti vetëm objekt pa përmbajtje dhe kuptim, përkundrazi i dha zgjidhje njerëzisë dhe u bë fjalë e gjallë dhe ligji i jetës, sipas të cilit zhvillohet jeta.

Nata e Kadrit përveç rëndësisë së madhe si ngjarje historike, në të njëjtën kohë paraqet natën mjaft të dobishme për çdokënd që dëshiron t'i kthehet Allahut dhe ta pastrojë shpirtin e tij.

Kuptohet se vlera dhe dobia e kësaj nate është për atë që di ta shfrytëzojë. Kjo natë; **“është më e vlefshme se një mijë muaj”**, siç thotë Zoti në Kur'an. Nëse do ta marrim

në konsideratë faktin se gjeneratat e mëparshme kanë qenë me jetëgjatësi më të madhe, e rrjedhimisht e kanë adhuruar Zotin më shumë dhe kanë fituar më shumë shpërblim, në këtë thënie del në pah drejtësia e Zotit për t'u dhënë mundësira të barabarta njerëzve për ta adhuruar Krijuesin e tyre. Në këtë natë zbresin melaiket, në qiellin e dunjasë, në tokë e rreth njerëzve, ashtu siç zbresin dhe kur njerëzit grumbullohen për të marrë dije të dobishme dhe për të lexuar Kur'anin.

Kjo natë karakterizohet nga një qetësi admiruese, njerëzit janë më të qetë dhe më të prirur për punë të mira.

❧ Ç'NDODH NË KËTË NATË: ❧

- ❧ Në këtë natë vendoset fati i të gjitha krijesave për vitin e ardhshëm.
- ❧ Në këtë natë shkruhet se kush do të jetojë dhe kush do të vdesë.
- ❧ Shkruhet se kush do të nderohet e kush do të mallkohet.
- ❧ Shkruhet se kush do të paracaktohet për në Xhenet, e kush do të paracaktohet për në Xhehenem.
- ❧ Shkruhet se ku do të paraqitet thatësia dhe uria.
- ❧ Shkruhet se kush do ta kryejë haxhin atë vit e kush jo.
- ❧ Në këtë natë përcaktohen rrisqet.
- ❧ Çështjet e atij viti dërgohen nga Leuhi Mahfudh për tek melaiket të cilët shënojnë urdhrat.

❧ DISA HADITHE QË FLASIN PËR VLERËN E NATËS SË KADRIT ❧

- ❧ Muhamedi, alejhi selam, ka thënë: **“Kush e kalon në namaz Natën e Kadrit me besim tek premtimi i Allahut dhe shpresë tek Ai (për shpërblimin), i falen mëkatet që ka bërë më parë.”** E transmeton Buhariu